

ESANAK

MIREN AZKARATE

(Jaurlaritzako Kultura sailburua)

«Kontua ez da gaur egun lanik ez dagoela, lana egokitu egin behar dela baizik»

«Finantzaketa irizpide berriak beharko dira, kalitate eta emaitza akademikoen arabera»

«PPren kritikak esan nahi du alor oso baten profesionalizatzeko ahalegina ez dela onartu nahi»

PATXI AGIRREGOMEZKORTA

(Ullibarri euskaltegia)

«Helduen euskalduntze eta alfabetatzearen sustatzea ahalbidetuko duen politika egokia behar da»

«Murritzeko eta zigortzeko neurriak alde batera utzi, eta aldeko dinamika bat sortu beharko litzateke»

rako, babestu egin zuten Azkaratek adierazitako lan ildoak. Hala, EAJko Txomin Aurrekoetxeak «pozez» hartu zuen moldaketari ekin beharra: «Poztu egiten nau ikasleriaren jaitsieragatik egin behar izateak, horrek esan nahi baitu gure hezkuntza sistema ondo baino hobeto dabilela». Eledun jeltzalea Azkaratekin bat etorri zen «beste bide batzuk zabaldu beharra» dela esatean.

Sozialista Abertzaleen taldeko Jone Goirizelaiak, berriz, bere taldeak Kultura Sailaren plangintzari proposamenak egingo dizkiola agindu zuen.

PSEko Isabel Celaak ere oso ontzat jo zuen euskaltegiek urteetan egindako lana, baina egoera ikusita «zentro asko eta asko itxi beharrean» egongo direla aurreikusi zuen, «eta ez da inolaz ere izango kalitaterik ezagatik».

Bestetik, Celaak kritikatu zuen alorren erabiltzaileak partaidetzarik ez izatea, adibidez, Euskararen Aholku Batzordean. Kultura sailburuak erantzun zion aipatutako batzordea «suspertzeko» asmo sendoa daukala.



RAUL BOGAJO / ARGAZKI PRESS

Aurten Bai fundazioko Andoni Unzalu eta Bilboko Ullibarri euskaltegiko Patxi Agirregomezkorta, atzo, Legebiltzarrean.

«Baliabideekin kalitatea bermatu ezinean gaude», diote euskaltegiek

Euskaltegiek duten «egoera larria» salatu dute Eusko Legebiltzarreko batzordean

L.K.G. | GASTEIZ

Arabako, Bizkaiko eta Gipuzkoako euskaltegiak, gaur egun dituzten baliabideekin, «gizarteak eta Administrazioak eskatzen duten profesionaltasuna eta kalitatea bermatu ezinik» dabilzala salatu zuten alorren ordezkariak Eusko Legebiltzarreko batzordean egindako agerraldian.

Aurten Bai Fundazioko Andoni Unzalu eta Bilboko Ullibarri euskaltegiko Patxi Agirregomezkortak helduen euskalduntzea «egoera larrian» dagoela ohartarazi zuten atzo arratsaldean, Eusko Jaurlaritzako sailburu Miren Azkaratek bideragarritasun plana indarrean ezarriko dela iragarri ondoren.

«Neurri murriztaileak eta zigorrak» baztertzeko deia

Agirregomezkortak aldarrikatu zuen euskaltegiek gaur egun ez dutela baliabide nahikorik eskari berrietara egokitzeko, eta, gauzak hala, alde biko proposamena egin zuen auziari irtenbidea eman nahian.

Alde batetik, «helduen euskalduntze-alfabetatzearen sustatze lana ahalbidetuko lukeen hizkuntza politika egokia» exijitu zuen, Parlamentuan egonik ere, Eusko Jaurlaritzari begira.

Horrek hiru osagai izango lituzke: politika horrek «bateratzaile eta globala» izan beharko luke, «neurri murriztaile eta zigortzaileak alde batera utzi eta aldeko dinamika berria» sortu beharko litzateke, eta «euskarren erabilera bultzatzeko eta motibazioa pizteko» ekimenak ere ezinbesteko izango lituzke.

Euskaltegien aldarrikapenak beste ardatz bat duela argitu zuen, sektoreak «normalizatorako bitartekoak izan behar baititu». Hori garatzeko, beste hiru neurri azaldu zituen: lan baldintzak hobetzea «duintasun gutxienekoa» ahalbidetuz, «diru-laguntza hitzarmen egokiak» eskaintzea eta «langileen heziketa» bideratzea.

Soldatan %30 gutxiago jaso eta lanorduak %18 gehiago egin

Agirregomezkortak eta Unzalu datu dezente agertu zituzten, euskaltegiatako langileek jasaten duten egoeraren berri emateko asmoz. Hala, euskaltegiko irakasle batek, Lehen Hezkuntzako batekin alderatuta, urteko soldata gordinen %30 gutxiago kobratzen duela eta %18 lanordu gehiago egin behar izaten duela esan zuten.

Euskaltegien ustea da Administrazioak sektoreari exijitzen diona eta, ordainean, alorren

lanari egiten dion aitortza ez daudela maila berean.

Aurten Bai eta Ullibarriko arduradunek gogora ekarri zuten Euskara Biziberritzeko Plan Nagusiak edo HABE arautzen duen legeak diotena helduen euskalduntzea sustatu beharri buruz, eta, jarraian, benetako egoera «oso bestelakoa» dela zehaztu.

Ildo horretan, gogor salatu zuten gaur egun Eusko Jaurlaritzaren eskutik jasotzen dituzten

diru laguntzak orain dela sei urtekoak baino txikiagoak izatea (%2 gutxiago). Epe berean, irakaskuntza pribatua arautzen duen lan hitzarmenak %24ko gorakada izan duela adierazi zuten.

Langileak ez ezik, ikasleak ere kaltetu zuzenak dira

Krisi egoera horretan kaltetu zuzenak, «euskaltegiatako langileak ez ezik, euskara ikasteko matrikula tasak pagatu beharrean diren herritarrak ere» badirela erantsi zuten.

Euskaltegiatako langileen ezaugarri dagokienez, gehienak 35 eta 55 urte bitartekoak dira (%53), eta 25 eta 35 urte bitartekoak (%40); 25 urtetik beherakoak %3 besterik ez dira. Bestalde, erdiek baino gehiagok lizentziatura dute (%53), Irakasletza ikasi dute %17k, eta diplomatura %14k.

Biak ere alorren ordezkari gisara aritu ziren agerraldi parlamentarioan. Sektoreak 121 euskaltegi ditu (40 publiko eta 81 pribatu), eta 2000-2001eko ikasturtean 37.000 ikasletik gora zituzten, 1.500 irakasle eta ia milioi bat talde-ordu.

Azken 25 urteetan kudeaketan, didaktikan eta teknologietan egindako egokitzapen eta aurrerapausoak «oso nabarmenak» izan direla esan zuten.

ESKARIAK

1,8 milioi euro gehitzeko eskaera

Euskaltegiatako ordezkariak hiru puntuko eskaria egin zuten Legebiltzarrean:

DIRUA. Prozesu berrirako, 1,8 milioi euro gehitzea euskaltegien diru atalean.

HOMOLOGAZIOA. Hiru urterik barne hezkuntza pribatuarekin homologatzea.

ONARPENAK. Ikasle informatikoak eta Internet bidezkoak onartzea 2002-2003an.